

Franse Revolusie

Jy het dalk al van [Marie Antoinette](#) gehoor? Sy was baie lank gelede 'n koningin in Frankryk en het vreeslik baie geld spandeer terwyl baie mense in die land arm was. Daar is beweer dat sy gesê het die mense moet koek eet toe sy hoor dat hulle nie geld vir brood het nie! Dis egter net 'n **legende** en dit is glad nie seker of sy dit wel gesê het of nie.



Marie Antoinette.

Die Franse Revolusie word as 'n **waterskeidingsoomblik** in die geskiedenis gesien, want dit het 'n groot impak op Frankryk en die res van die wêreld gehad.

'n **Revolusie** is 'n groot en belangrike ontwikkeling wat heeltemal anders is as enigiets wat dit voorafgegaan het. In hierdie geval beteken dit ook dat die mense van 'n land baklei om die bestaande regering met 'n regering van hul keuse te vervang. ¹

As ons van hierdie revolusie praat, word daar algemeen aanvaar dat dit op 14 Julie 1789 in Frankryk begin het. Die ontevrede Franse het die Bastille-tronk in Parys bestorm. Slegs vier jaar later is die Franse koning en koningin onthoof en die land het 'n **republiek** geword. Die mense het tydens die revolusie "vryheid, gelykheid en broederskap" geëis. ²



Die revolusie het 'n paar jaar geduur, maar Frankryk het nooit weer 'n ongelyke samelewing geword nie. Die idees van die revolusie het boonop na ander lande versprei.



Agtergrond

In die 1780's was daar baie groepe in Frankryk wat ongelukkig met die stand van sake was; hulle wou graag 'n verandering in die samelewing sien. Een van die

groepe is die **bourgeoisie** genoem. Dit was 'n nuwe klas van welvarende stedelinge wat meer mag wou hê. Die gewone man op straat wou egter ook verandering sien en so ook die plaaswerkers wat moeg was om sonder betaling vir die **adellikes** of ryk grondeienaars te werk.

Gewone werkers moes boonop baie hoë **belasting** betaal, wat die adellikes nie hoef te betaal het nie. Daar was ook Franse filosowe wat gevra het vir 'n nuwe vorm van samelewing en regering. ³



Die Franse regering se geldsake was in daardie stadium **beroerd** en die **staatskoffers** was leeg. Hulle het hopeloos te veel geld aan oorloë spandeer, soos in die Amerikaanse Revolusie waar Frankryk die koloniste gehelp het om die Britte te oorwin. ³

Ten spyte daarvan dat die land op die rand van **bankrotskap** was, was die Franse koning Lodewyk XVI en koningin Marie-Antoinette steeds baie **spandabelrig**. Hulle het onnodig geld uitgegee op dinge wat hulle nie nodig gehad het nie.



Daar was boonop twee dekades van swak oeste, droogte, diersiektes en hoë broodpryse wat die gewone mense baie kwaad gemaak het. Hulle was desperaat en het die koningshuis verwyet omdat hulle glad nie hul burgers gehelp het nie en net swaar [belastings](#) gehef het. ⁴

Ons kan dus sê dat 'n **teelaarde** vir groot moeilikheid geskep is.



Die revolusie begin

Die Franse burgers het hul ongelukkigheid gewys deur te staak, te betoog en plekke te plunder.

Charles Alexandre de Calonne, een van die koning se amptenare, het in 1786 'n finansiële **hervormingspakket** voorgestel wat 'n grondbelasting sou instel. Dit

sou beteken dat die ryk klas, die adellikes, vir die eerste keer ook belasting sou betaal. ⁴



Die koning wou ondersteuning vir hierdie nuwe regulasies kry en het die landgoedgeneraal (*les états généraux*) byeengeroep om die verskillende klasse van Frankryk te verteenwoordig. Dié vergadering in 1789 was die eerste ontmoeting sedert 1614 tussen die drie landgoedere van **prerevolusionêre** Frankryk: die kerklui, adelstand en gewone burgers. ⁵



Die vergadering is vir 5 Mei 1789 gereël en intussen sou **afgevaardigdes** van die drie groepe 'n lys van hul griewe maak om vir die koning te gee. ⁴

Nie almal in hierdie raad was gelukkig oor die stand van sake nie. Die middel- en laerklas was vies omdat die adellikes steeds **vetoreg** gehad het. Dit beteken dat hul stem die finale sê was. Al sou die middelklas byvoorbeeld vir iets stem, kon hulle net sê, "Nee, ons weier/aanvaar dit nie".



Die mense wat nie deel van die adelstand was nie, het 98% van die bevolking uitgemaak. Al was hulle so baie, kon hulle steeds deur die ander twee groepe uitgestem word. Hierdie mense het ondersteuning vir gelyke verteenwoordiging begin soek. Hulle wou dus gehad het dat almal moes stem en dat die stemmery nie deur status bepaal moes word nie. Almal se stem moes dus dieselfde gewig dra. Die adellikes wou niks weet nie, want hulle wou natuurlik nie hul voorregte prysgee nie.



Teen die tyd wat die groep vir die Versailles-samesprekings bymekaargekom het, was daar groot vyandigheid tussen die groepe en samesprekings het op 'n dooie punt uitgeloop. Dit beteken dat niemand kon ooreenstem nie. ⁴

Die groep wat wel saamgestaan het, was die sogenaamde Derde Stand. Dit het uit

die lae- en middelklas bestaan en hulle het alleen vergader en hulself as die Nasionale Vergadering verklaar. Hulle het drie dae later ook by 'n tennisbaan byeengekom en die sogenaamde Tennisbaan-eed (*Le serment du Jeu de paume*) afgelê om grondwetlike hervorming te laat plaasvind. ³



Binne 'n week het daar wel adellikes en verskeie geestelikes by hulle aangesluit op 27 Junie moes die koning dit maar aanvaar. ⁴

Bestorming van die Bastille

Op 12 Junie was die Nasionale Vergadering nog aan die werk aan 'n nuwe grondwet en het by Versailles vergader. Intussen was daar talle voorvalle van geweld in Parys en mense het begin vrees dat 'n **staatsgreep** sou plaasvind. ⁴



Die bestorming van die Bastille op 14 Julie 1789.



Die dae van spanning en betogings het uiteindelik daartoe gelei dat betogers op 14 Julie 1789 'n ou gevangenis, genaamd die Bastille, bestorm het. Hulle wou wapens en buskruit hê en dit word **allerweë** as die begin van die Franse Revolusie gesien. ³ Daar was ook 10 soldate gevange gehou. Hulle was deel van die Franse Wag wat besluit het om nie aan opdragte gehoor te gee nie. ⁶



Vizille, Frankryk.

Hierdie onrus het gou na ander gedeeltes van Frankryk versprei en die arbeiders het begin rebelleer. Belastingbetalers en grondeienaars se huise is afgebrand en die adelstand se kastele is vernietig. Ná hierdie voorval het baie van die adelstand besluit om hul voorregte vrywillig op te gee. Hierdie tyd het as die Groot Vrees (*la Grande peur*) bekendgestaan en baie adellikes het uit die land gevlug. Dit het ook as motivering gedien om **feodalisme** af te skaf. ³

Feodalisme was die oorheersende maatskaplike stelsel van die [Middeleeue](#) in Europa waarvolgens leenhere grond aan mense in ruil vir dienste geleen het.⁷



Die Nasionale Vergadering het op Augustus 1789 'n deklarasie aanvaar wat bepaal het dat alle mense vry gebore word en gelyke regte het. Die Nasionale Vergadering het baie veranderings gemaak wat die bevolking sou raak en daarvolgens is feodalisme afgeskaf. Arbeiders hoef nie meer op die adelstand se plase sonder betaling te gewerk het nie. Die Vergadering het ook baie eiendom van die Roomse Katolieke Kerk gevat en die meeste manlike burgers [stemreg](#) gegee.

Dit was egter 'n gesukkel om 'n amptelike grondwet op te stel en die Nasionale Vergadering het vir lank gewroeg oor hoe Frankryk se nuwe politieke landskap moet lyk en wat van die koning en sy rol moes word.⁴

Frankryk se eerste geskrewe grondwet is op 3 September 1791 aanvaar en 'n grondwetlike **monargie** is gestig waarin die koning wel vetoreg gehad het.

Sekere mense het niks daarvan gehou nie. Die **voorbokke** van hierdie groep was Maximilien de Robespierre, Camille Desmoulins en Georges Danton. Hulle het hulle begin beywer vir 'n republiek en vir die verhoor van die koning.



In April 1792 het die nuut verkose volksraad oorlog teen Oostenryk en Pruise verklaar, want hulle het geglo dat daar Franse bly, wat **alliansies** teen hulle bou om hulle **omver te werp**. Daar was ook nóg 'n krisis in Frankryk self met die radikale groep die Jakobyne wat die koninklike woning in Parys aangeval en die koning op 10 Augustus 1792 gevange geneem het.

In die maand wat gevolg het, was daar 'n golf van geweld en baie mense is doodgemaak. Die volksraad is in dié tyd met 'n Nasionale Konvensie vervang, wat die einde van die monargie en die stigting van die Franse Republiek beteken het.

Koning Lodewyk XVI is op 21 Januarie 1793 op aanklagte van hoogverraad en misdad teen die staat gevonnissen en ter dood veroordeel. Hy is na die **guillotine** gestuur. Sy vrou, Marie-Antoinette, is nege maande later ook onthoof.



Die Jakobyne het met 'n skrikbewind begin en groot vrees onder die mense gesaai. Omdat hulle bang was dat daar nie genoeg mense was wat hul revolusie wou steun nie, het hulle begin om talle mense in hegtenis te neem en dood te maak. Hulle het selfs 'n nuwe kalender ingestel en probeer om [Christenskap](#) in die land uit te wis. Kerke is nie eens meer kerke genoem nie.

Uiteindelik is meer as 300 000 mense in hegtenis geneem en meer as 17 000 doodgemaak. Baie van hulle was slagoffers van die guillotine. Uiteindelik is daar 'n einde aan die Jakobyne se skrikbewind gemaak toe ander lede van die Konvensie in Julie 1794 hul leiers in hegtenis geneem het. Hierdie Jakobynse leiers is toe ook na die guillotine gestuur.



Die teregstelling van Robespierre en sy ondersteuners op 28 Julie 1794. Let wel: die onthoofde man is nie Robespierre nie, maar Couthon. Maximilien Robespierre word getoon waar hy op die kar sit, geklee in bruin, met 'n hoed en 'n sakdoek in sy mond. Sy jonger broer Augustin word na die steier gelei.

Einde van die revolusie

Nadat die Jakobyne se **bloedbad** verby was, het die parlement die sogenaamde *Directoire* aangestel. Dit was 'n raad van vyf lede en die uitvoerende mag van die land was in hul hande. Daar was ook opposisie teen hulle, maar die weermag is deur 'n jong en suksesvolle generaal, wat vinnig teen hulle opgetree het, gelei. Dié generaal se naam was [Napoleon Bonaparte](#).



Napoleon Bonaparte

Die nuwe raad het vir vier jaar geregeer, maar daar was opnuut probleme soos geldkrisisse, **korrupsie** en algemene ontevredenheid onder die bevolking.

Napoleon Bonaparte het vervolgens 'n staatsgreep of *coup d'état* uitgevoer en homself as Frankryk se eerste **konsul** aangestel.

Dit het 'n einde aan die Franse Revolusie gebring en was die begin van die

Napoleontiese era. In hierdie tydperk het Frankryk kontinentale Europa gedomineer.

Napoleon het toenemend mag gekry en in 1804 het hy homself as Napoleon I verklaar, die keiser van Frankryk. Die land is daarna vir die bykans 70 jaar deur keisers en konings geregeer totdat Frankryk uiteindelik in 1871 weer 'n republiek geword het.



Woordbank

adellikes	Mense wat aan die hoogste stand behoort.
afgevaardigdes	Iemand wat met 'n bepaalde opdrag gestuur word om ander te verteenwoordig.
allerweë	Oral, in alle opsigte.
alliansies	Verdrag deur state aangegaan om mekaar onder sekere omstandighede te steun, veral met wapengeweld; bondgenootskap; verbond.
bankrotskap	Wanneer 'n mens nie meer geld het om jou skuld te betaal nie.
belasting	'n Gedeelte van jou maandelikse salaris wat aan die staat vir openbare dienste betaal word.
beroerd	Ellendig, sleg, swak.
bloedbad	Om verskeie mense wreed om die lewe te bring.
bourgeoisie	Die middelklas of burgerstand.
feodalisme	Feodalisme was die oorheersende maatskaplike stelsel van die Middeleeue in Europa waarvolgens leenhere grond aan mense in ruil vir dienste geleen het.
guillotine	'n Toestel waarmee mense onthoof is en wat uit 'n swaar, vlymskerp lem bestaan wat in twee oorlangse groewe in die regop styl van 'n kosynagtige konstruksie gly. Dit word ook 'n valbyl genoem.
hervormingspakket	Verandering.

konsul	'n Verteenwoordiger van een land of volk in 'n ander land om sy eie volksgenote te beskerm en om handelsbetrekkings te bevorder.
korrupsie	Oneerlike optrede om jouself of 'n ander te bevoordeel; die gebruikmaak van omkoping of die meedoen daaraan.
legende	'n Verhaal wat nie op die waarheid berus nie, maar op stories wat deur die eeue deur mense oorvertel word.
menagerie	Versameling van diere in hokke, klein dieretuin.
Middeleeue	Tydvak tussen die oud en nuwe tyd, ongeveer tussen die jaar 476 tot 1492.
monargie	Alleenheerskappy.
omver te werp	Om iets te laat misluk.
pakket	Aanbod van 'n som geld (in hierdie geval wat belasting insluit).
prerevolusionêre	Voor 'n revolusie.
republiek	'n Regeringsvorm of staat waarin die oppergesag berus by stemgeregtigde burgers en hul verteenwoordigers.
revolusie	'n Revolusie is 'n groot en belangrike ontwikkeling wat heeltemal anders is as enigiets wat dit voorafgegaan het. In hierdie geval het dit met geweld gepaardgegaan.
spandabelrig	Wanneer iemand links en regs geld uitgee.
staatsgreep	Wanneer 'n land se regering gewelddadig deur ander inwoners van die land oorgeneem word.
staatskoffers	Die staat se geld, kapitaal (ook staatskas genoem).
teelaarde	Broeiplek, begin, beweegrede.
vetoreg	Die reg om iets te verbied, te weier, af te keur of te verwerp.
voorbokke	Leier, voorloper, aanvoerder.
waterskeidingsoomblik	'n Gebeurtenis wat 'n duidelike verdeling of verandering veroorsaak.

Lees dié artikels om meer te leer

- [Die Franse Revolusie](#)
- [Bastilledag](#)
- [Wie was Marie-Antoinette?](#)

Kyk dié video's om meer te wete te kom

Wat was die Franse Revolusie?

Feite oor die Franse Revolusie

Wat het die Franse Revolusie veroorsaak?

Só word Bastilledag jaarliks in Franschoek gevier